

Ladina Heimgartner – substituta dal directur general

SRG SSR: «In pajais sa viver senza radio e televisiun, ma el vegn in auter pajais»

■ (rtr) Ad ina conferenza da medias ha il nov directur da la SRG SSR Gilles Marchand preschentà il venderdi las prioritads da sia lavur. Per sustegnair el ha el nominà Ladina Heimgartner, la directura dad RTR, sco sia substituta. Ladina Heimgartner vegn a remplazzar il directur general en cas d'absenzas. Gilles Marchand è succedi l'emprim d'october a Roger de Weck sco directur general da la SRG/SSR. Il venderdi ha el preschentà las prioritads per sia lavur ed il team cun il qual el vul realisar quellas sfidas.

Dialog constructiv ed avert cun il public

Gilles Marchand (54), l'antierur directur da Radio Télévision Suisse (RTS), ha sut-

tastritgà sia prontezza ad in dialog avert e constructiv – tant cun las ulteriuras medias sco er cun il public. El sa saja conscient da la gronda sfida, ha ditg Marchand envers las medias.

«Ensem cun mias e mes collegas en las regiuns ed a Berna vegn jau a m'engaschar plainamain per l'avegnir dal service public, perquai che jau sun persuadi da s'impurtanza per noss pajais», ha ditg Gilles Marchand, il directur general SRG SSR. Perquai vul Marchand porscher vinavant programs excellents en tut las quatter linguas uffizialas, segirar la professionalità e l'indipendenza da las redacziuns, promover la midada digitala en la SSR, mantegnair il contact cun il public giuven e cuntnuar dad investir en la cultura.

Tschintg projects da cooperaziun concrets

En ses discurs a las medias ha il directur general intunà quant difficila che la situaziun per las chasas da medias privatas saja en vista al tempo da la digitalisaziun. Perquai valia uss da promover la cooperaziun. Quai vul Marchand far cun tschintg projects concrets.

Il team da Marchand

Ensem cun la nominaziun sco substituta ha il directur general er surdà a Ladina Heimgartner il dossier «medias e societad» per tut la SRG SSR.

La finamira haja dad esser dad accumplir anc meglier l'incumbensa che la SSR haja survegnì da la societad.

«En il temp dad oz vul quai er dir che nus vegnin pli averts e pli dynamics, che nus tschertgain pli ferm il dialog cun la societad e tadrain attentamain.»

Ladina Heimgartner, substituta dal directur general SRG SSR

La SRG SSR vegnia a s'engaschar en il futur anc pli sapientivamain ed activamain sco actura relevanta per la societad svizra, ella vegnia a crear anc dapli plivalur ed era a communitgar quai da moda adattada e regulara, ha circumscrib Marchand quest dossier.

Direcziun «Svilup e purschida» a partir dal 2018

En sia lavur survegn la direcziun da la SSR SRG sustegn dad ina persuna nova: Bakel Walden (42) surprena la partiziun nova «Svilup e purschida» che unescha la coordinaziun da program, la transformaziun digitala, la perscrutaziun dal martgà e dal public ed il barat internaziunal.

Walden mida da la strategia da program SRF en la direcziun generala

Midadas er tar la «Chadaina da fortuna». La «Chadaina da fortuna» survegn in nov president. Cun la fin da l'onn remetta Ladina Heimgartner il mandat da presidenta. Sco successur ha nominà il nov directur da la SRG/SSR Pascal Crittin ch'è directur dad RTS.



Il president da la SRG SSR cun sia squadra nova: Jean-Michel Cina, Ladina Heimgartner, Gilles Marchand e Bakel Walden (da san.).

FOTO SRG SSR

En tschintg projects da cooperaziun ...

- surlaschar a medias privatas immediatamain videos da novitads per lur diever
- proponer a radios privats da surpender sias novitads da radio
- metta la SRG SSR a disposiziun sia tecnologia per ina plattform averta da cuntengens
- promova e tschertga ella cooperaziuns per l'innovaziun da medias
- metter ad ir in sistem da mesiraziun per online.